



## PORTAVÓS VI GOVERNUN KONSTITUSIONÁL



## KOMUNIKADU BA MEDIA

Díli, Loron 26 fulan-novembru tinan 2016

### **Orsamentu Jerál Estadu nian ba 2017 aprova ona iha jeneralidade ho unanimidade**

Proposta kona-ba Orsamentu Jerál Estadu nian ba tinan 2017 aprova tiha ona husi Parlamentu Nasionál iha jeneralidade, iha loron 25 fulan-novembru kalan, ho votu afavor hamutuk neenulu-resin-rua, no laiha votu kontra no abstensaun.

Agora Parlamentu sei ba konsidera fali orsamentu ne'e iha spesialidade no diskute hodi vota ba artigu ida-idak hosi projetu lei ne'e molok halo votasaun final global, ne'ebé sei hala'o iha loron 14 fulan-dezembru nian.

Iha ninia diskursu maktakak plenaria loron tolu ne'e nian, Ministru Estadu Agiu Pereira agradese ba membru Parlamentu Nasionál ba "debate iha jeneralidade ne'ebé la'o ho forma demokrátika no konstrutiva", hodi dehan katak "komentáriu, sujestaun no kritika sira ne'ebé konstrutivu hariku debate ne'e no sei kontribui ba implementasaun ida ne'ebé di'ak liu husi Orsamentu ne'e, ne'ebé maka la'ós Governu nian, la'ós Parlamentu nian, maibé timoroan tomak nian no ba timoroan tomak.

Durante debate iha plenaria, Komisaun-C husi Parlamentu Nasionál, ne'ebé simu knaar atu analiza finansa pública sira, hato'o ona ninia relatóriu. Hafoin sesaun pergunta no debate kona-ba kestaun sira ne'ebé maka mosu, deputadu sira apresenta alterasaun balun ba lei ne'e, ne'ebé maka oras ne'e daudaun Komisaun Eventuál ba Rekolla no Análize Proposta Alterasaun sira ba Projetu Lei ne'e organiza hela.

Iha debate ne'e, Governu afirma fila-fali katak orsamentu ne'e projetadu atubele permite Governu hodi continua serbisu ba diversifikasaun ekonomia nian, hodi reforsa infraestrutur sira ne'ebé esensial ba kreximentu tempu naruk nian. Proposta sira husi Governu ne'ebé refleto iha Orsamentu ne'e buka apoia kriaun kondisaun sira atu halais atividade setór privadu nian no dada investimentu husi empreza sira.

Iha sesaun taka debate ne'e nian, Ministru Agiu Pereira hateten katak "kompromisu Governu Konstitusionál VI nian mak ezekuta orsamentu ne'ebé ohin ami submete ba atu hetan konsiderasaun husi distintu Deputadu sira ne'e, ho sentidu responsabilidade nian tomak iha implementasaun husi projetu no programa sira ne'ebé kontribui ba dezenvolvimentu sustentavel país nian no atu hadi'a ita-nia sidadaun sira-nia kualidade moris". **REMATA**



**Agiu Pereira**

+670 7723 0011

[agiu.pereira@cdm.gov.tl](mailto:agiu.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)